


١٠١٢٩  
المجلس الأعلى للثقافة

# رسوم متحركة

صادق شرشر

معرض - أول وأبسط



0016094

Bibliotheca Alexandrina





المجلس الأعلى للثقافة

---

الكتاب الأول

رسوم متحركة

---

شعر

صادق شرشر

الافراج الفنى والرسم : سعيد المسيرى

# الإهداء

---

إلى والدي  
وأخوتي  
وأصدقائي  
إلى حجرتي الصغيرة..  
وكل شيء في العالم ينتهي بحكمة الحب

ص . ش



بلیاتشو قال ایہ بس فایده فنونی  
وتلات وفق مساحیق بیلونونی  
والطبل والزمیر وکتر الجمیر  
اذا کان جنون زبونی زاد عن جنونی

عجبی

صلاح جاہین





واحد قام م النوم  
ملقاش حرب  
ملقاش شوارع بتفر منها الطيارات  
مافيش بيوت مركونة جنب النيل  
ولا ملايكه راجعين م الحانات سكرانين  
دروب فاضية  
وكبارى متعلقة من غير سلاسل  
هى دى المدينة اللى اخترعها الحزن.





# قصائد من دولاب الحزن

---





## صورة من دولاب الحزن

أكبر عيالها القمر

أصغر ولد فوق الحصان اللعبة

وف حجرها الكعبه

طيور خضرا

بتزف العيال فوانيس:

بريلا بريلا بريليلا

وطريقى شايف عيونها الجميلة

وحقيقى مش عارف آخرها

بعيدة جداً وما بتسمعش..

الروح بيان قلبها المفتوح

سبعين جناح على كتفها

هى اللى شالت سرير الجروح

يمكن وغابت

يمكن وخرجت من شبائك السما

يمكن وقفلت على كل الحلل

يمكن بعد ما أروح ألقى الباب متوارب

يمكن تصحى وتعطش

يمكن...

فين طريق فى الصلاة ما يودنيس للهلاك


فوق التلفزيون

تحت الكنبه - الكراكيب -

سجاده وأصلها جلاليب

مين اللى عرى الحيطان وغطانى؟





دلوقتى مش فاكر  
ولاهى سامعانى  
الأوده معبأة دخان  
ولاخرم إبره يهرّب الصور اللى واقعة  
من دولاب الحنين...!  
مناديلها القماش مترتبه فى الدرج  
علب الدوا واختتم..  
إيه اللى خلى الإسطوانة تدور؟!  
دا صوت ملاك مسكين  
«صالح عبد الحى» يفكرنى بالعشق القديم  
بالورده البيضاء  
والمشى ع الكوبرى سنة عشرين  
ساعة ما كان «النيل» هنا  
و «ميدان الأزبكية» بتعدى منه الترميات  
والعربيات باحصنة



ضحكتها فى الصورة  
وهى بتقول لى:  
الكلمة دى عثمانلى  
فستان الزفاف كرانيش  
والدخلة بعد المغرب  
لاحد شاف طرفها  
وفضلت أنا مستغرب  
سنين بتقرب  
سنين وقعت  
نتيجة خلصت منها دنيا  
دنيا فضلت منها صوره  
وتاريخ ع الغلاف.  
١٩٢٦/١١/٢٢



ليل قديم  
ووصلة حزن قديمة  
وانت وحيد كالعادة  
قاعد في الصف الخلفي  
ورا صناديق الضحك  
والكاميرا بتبعد...





## شارلى شابلن

سينما «الكيت كات» كامل العدد

شارلى شابلن واقف يشوف التذاكر

إلحق

شوف مين ع الباب عمال بيوزع ضحك

واحد يزعق لاتنين عشاق فى الكرسى الورانى

والبوسة طلعت فى المشهد..

شارلى شابلن خارج م الدولاب

بيلف عكازه

لما لحنى ابتسم واترسم..

على باب الأوده ودعنى

زى مايكون الطريق فرسه بتتحول

مشهد خرافى لسيرك متجول

أديت التحية لمن؟

للمغرمين بالحزن

وانحنيت..

قد إيه مشيت

وقد إيه رجعتى؟

على باب السينما الصامته

نسيت البالطو والبرنيطة

خيالك ع الشاشة يسحب أحزان الجمهور

جوا جيوبك كام منديل لو طار عصفور

أحلامك جوا شوارع ناس بتنام م المغرب

وأنت المتجول



والمتحول فى الألوان

على باب الجرح بترجع آخر الليل سكران  
كام حزين أديت له التحية بلهجه مكسره؟!  
وقعت سنانك لما جيت تضحك،

وجريت ورا دخانك

كانت الشبابيك - عينيك - بعيدة

مديت إيديه لقيت إيديك تحويده

خدتك فى حضنى وبكيت

أديت التحية

واختفيت



## المغنى

مشهد لمغنى إيديه مقطوعة

وبيعزف ع «الأوكورديون» كل يوم

جنب سور الجنينه

فاكرنى؟

مش بالظبط

لحقته؟

مش بالظبط

كان بيظهر فى الميدان لحظة ويختفى!

دخان العودام ييلم أفكار الصنایعيه اللى رايعين الورش

والمشقفين اللى نايمين فى البارات  
ما بيسمعوش صوته اللى اتكنس ويا أعقاب السجاير والنشارة  
كان

والمزيكا اللى ماشيه وراه تبعد.  
كان المغنى الوحيد  
وكنت جمهوره اللى باقى من سنين العود

وتر.. ومفتاح الطريق ضايع

واحنا بنعدى الرصيف

مِلَّ على وبكى

فى البار الفقير شربنا

والسنين بتغفر للميتين أساميهها

كتب على الطاولة رحلته عبر المدنية

كان النهار راجع

وأنا بافتكر غنوته

سلم المزيكا خارج من جيوبه  
والفجر طالعين على ضى القزاز  
الشباكين مفتوحين ع القمر  
«فردوس» بتحجل بين الدفوف والنار  
كان يفتكرها  
ويفتكر خلخالها  
وعينه بتبرق بين كفوفها واللهب  
ساعة ما تضحك بسنتينها الذهب  
كان  
ومعاه فى جيبه خُصلة من شعرها  
ومرايه من رمل الجبل.





## أغنية لسندريلا

سندريلا معاها سله

فيها ورد

هى دايماً تيجى فجأة تبص لك

وتمد

معايا ورد

معايا ورد

كل اللى باقى من كلامها بيتخفق

ساعة ما تعبر ع الرصيف

ما تلاقيش غير عيلين فى عز الشتا متعودين ع الصيف

هما دليلها

ولا سؤالها

وراه نزييف؟

سندريلا شبع قلبى وجاعت

تلات وردات والمحطة بتحتفل

على ضى دمي

والطريق اللى اتقفل

كان ماشى بيها تهدده

وتبدده


ألوان من الفرح اليتيم

تنده على الرايحين

على الغايين:

معايا ورد

معاى ورد



## العميان

الليل نهار

والنهار ضلمه

تلات عميان على سهوه

قعدوا فى آخر دكه

آخر ركن

آخر خن

فى القهوه

وبصوت عالى قوى

زقق «الكوماندا» اللى فيهم:



تلاته قرفه

تلاته شيشة وطاوله

حسيت بحاجة بتتكش جوايا

واللى أثر فى فعلا

اللى شد القهوجى بهدوء

الفيلم مش عربى

حول لنا ع الكوره

قام الأخير اللى كان ساكت

وقال له:

اضبط لنا الإريال

واعدل لنا الصورة

ضحكت أول ماابتدوا يحكوا

عن ليل نهار مش فارق

ما بقتش أفكر فى أى حاجة

غير إني ماشى بأقل

والحساب بيزيد.

كام قمر فى السكة مش طالعين؟!!

وكام إيدين نخت فى الفراق

زى الطيور الوضيعة؟!!

وكام فجیعة؟

[وجريمة مش هى الى تشبه جريمة تمت]

فاكر

أول قلم علم

وأول عشق

وأول بوسه طبعاً

ومش فاكر

غير إني ماشى

وسايب

تلاته قاعدین

شایفهم

وشایفنی

ومش شایفین.



الدنيا

إلى صلاح جاهين

الدنيا

والعالم كله صغير

الواد اللي ماهدوش الحلم

والواد اللي تغير

الدنيا

والحصة الأولى فى عمرى

وأنا بأكل فى صوابعى الناعمة

بزك بقلمى الجاف ع الصفحة

عصفورة وفرحة

ونقطة حبر ثقيلة بتكبر

كان يفكر

أيوه أنا فاكِر

كان بيغنى

وعيونُه بتزوغ على بره

بره الفصل

بره الحوش

بره الدنيا

ولقيته فى ثانيه بيضحك

وبيغمز لى نقوم

كانت الحصة التانيه بتقفل

وابتدا يتأمل

كان واخد راحته ومبجح

وأنا قلبى عجوز ومكحكح



قالى لى ساعتها كلمة غريبة:

نفسى أهرب!

تعرف إن القطة بتولد كل عيالها فى بطن الشجرة

دمك أحلى من الخمرة

دوق جرحى

تقدر ترسم شمس لبكره؟!

بصيت له

وكان نفسى أعيط

دخلت رقبتى ما بين جلده


زمرت فى ودنه

واتشعلت كثير على كتفه

خذ نفسه وقالى لى:

أستنى

أنا هامشى نوحدى



خفت عليه لما الكوره اتحولت بره عينين

الشبكة

و كنت ساعتها جعان

كان هربان م الحصه الرابعة

قال لى :

أنا عازمك نشرب شاي

عدينا الجسر المتلون بالدخان

وكان كراسى القهوة بترقص زى الجان

مد إيديه فى جيوبه وطلع فرسه فى لون البحر الطيب

وشوية ملاليم مخرومة

صورة لبنت فقيره بتعصر جوا منامها الحلم

قال لى : إتمنى علىّ

قلت له :

نفسى اتخن زيك.

## اسكندرية

باكتب عشان افكر

رسام عجوز واقف على حافة رصيف البحر

وبيرسم العالم دواير

بورتريه

للمس ساعة الغروب

بورتريه

لواحدة قابلها بالصدفة في «شارع النبي دانيال»

بورتريه

لاسكندرية

والشيخ « كفافيس » وهو يرفى قميصه الوحيد

تحت الغيوم

فى اخر اللوحة علامة وبقعة من الألوان

بتزحف على الكورنيش

باكتب عشان افكر

ريحة الخمرة العتيقة فى شاطئ المندرة

وبياع الفريسكا

وهو بيرقص السمبا والتويست مع بنت

عجربة بتدخل فى الايقاع فجأة

الدومات الشديدة

واخفه إالى بتطارد ولد بيحب البحر

وبيخاف من منظر سفينة غرقانه فى الذاكره

و «صادق شرشر» بيسألنى عن معنى واحد لاحتفاظى بالتاريخ

على ظهر الصور ويسينى قدام السرير أفكر

ويطل من شباك بعيد في روايه لـ «هرمان هيسه»

على ملهى ليلي

في آخر البيت السحري أوده للمجانين

ويضحك وهو يكتب اسمه بالبنت العريض

«ذئب البوادي»

سرحان في الجملة اللي وقعت م الكتاب عن موسيقى الجاز

وعازف السكسفون الجميل

الصورة اللي طبعها في الذاكره

عن جنون «بيتهوفن» ولحظات الانتحار الحقيقية داخل

السيمفونية الخامسة

\*

باكتب عشان أضحك

وأنا ميت ورا البرواز

«وعينيا بتحاول تشاهد لون المهزلة في الحياة»

\*



كراسى قهوة التجارية

بتفكرنى بأشباح الحوادث القديمة

كراسى كانت فى الأصل ملايكه

واتحولت عفاريت أثناء غاره من غارات الحرب!

«بيرم التونسى» كان قاعد هنا

على نفسى الكرسي

بيشاور للقهوجى عشان يجيب له فنجان القهوة

[مشهد ما اتغيرش من ٥٠ سنة]

وكان بيننا ميعاد

حتى القهوجى ما اتغيرش

راجل أسمر طويل

كأنه مارد

حاضر مع السقفة

مع المشاريب

فوق دراعه الفوطه

يتسم بهدوء

فتبان سنانه البيضاء

راجل من زمن مسحور

وشه يشبه محطة السكة الحديد.

كأت أول مرة أخش البار من سنين

كل حاجة زى ماهى

الكراسى

القزاير

والوشوش السكرانين

عجبتنى الموسيقى اللى فى الجملة

فكتبتها ع الترايزة

وطلبت بيره

رغاوى البيره زى موج البحر

متهاً لى

هى دى الحقيقة الوحيدة فى حياتى

حياتى اللى اتوزعت بين الخمره

والشواطىء

والدواليب القديمة

\*

٣٠ يناير

مات الرسام العجوز

قبل ما تكمل الصورة

●

## ينائر

ساكن فى قصر فقير

وعندى بوابه

ليا حق الدخول

وحق الخروج من غير حرس

لو حبيت تزورنى

ما تجيش فى نص السنة

تعالى فى ينائر

أول ما يظهر قمر أزرق على كتف الجدار

من فضلك

وانت داخل

ملى اسمك ورقم الحزن لشجرة الياسمين

هتوقفك «سوسن»

قطتى الوحيدده

سلم عليها واديها كفك

مش هتندم

حاذر تلمسك موجة الورد اللى طالعة على شبابيك الكآبة

أو يشدك سلك شايك على سور القصيدة

إوعاك تبص فى عيون رانجو

أكبر كلاب القصر شراً

وله صحيفة سوابق

سنة ١٩٨٥ عض بنت الجيران وهى راكبه العجلة

كانت خناقة كبيرة

وانتهت بكسر رجله

وفى نفس السنة نط من تانى دور  
على كلب زينة وقرمه  
واللى حصل يومها بلاش أحكيه  
المهم انك تخاف على جيوبك م الواد المخيف  
«دقدق» لص البيوت العجوز  
نساس قشاط  
قبل ما يرتد طرفك يكون...  
إحترس  
وانت طالع ع السالام  
قتيل «ف» الشقة الى جنبك  
شبح قاعد على كرسى البيانو  
اتقدم وما تخافشى  
تلات خطوات وعد  
هنا بالضبط  
هنا قبرى.





رسوم متحركة

من سينما الحياة

---



## رسوم متحركة

### ١ البنطلون

البنطلون الرمادى القطيفة  
الى عاش معايا سنين وسنين  
من غير ما يتعب أو يشتكى  
هو نفس البنطلون «السكند هاند»  
الى إشتراك جدى من واحد خواجه فارش  
عند سور الأزيكية

«ميد إن هونج كونج»

البنطلون اللي عجزنى  
وكان سبب فشلى فى الحياة والحب  
هو البنطلون الثقيل فى الشتا  
والخفيف

الفاخ

الغامق

المكسوف

واللى عاش عصور كامله

«ميد إن هونج كونج»

\*

أعتقد

هيجى زمن جرىء

واحد جرىء

هيقلع بنطلونه ويعدمه

قدام الجميع.



## ٢ قميص

أجمل قميص فى الدولار.

بأكويه لأخويا الصغير

وكان أجمل قميص

بتكويه جدتى

أجمل قميص

بأكويه دلوقتى لأخويا الصغير

وبحاول أداوى جروح الياقة

## ٣ جاكٲ

الجاكٲ اللى إخترته عشان أفرج عليه  
المره الجايه هسأل البىاع بكام  
وقبل ما أتحرك هاسيب دايره بخار من شفايفى فوق الأزاز  
علشان لما آجى المره الجايه  
أبص عليه من زاويه أضيق  
الجاكٲ إالى لابسه الراجل الماريونيت  
شكله مضحك جداً ومهرول عليه  
إزاي الفاترينات مقفوله ع الهدوم  
بالشكل دا...!  
وما فيش مساحه للتنفس  
وأنا لما هاآجى المره الجايه!  
إزاي هافتكر مكان شفايفى  
ودايره البخار إالى نسيتهها فوق الإزاز



## كاريكاتير

- ١ -

ساعات بأتخيلك أرنب

أرنب يعرف ينط م الدواليب

ويسمع موسيقى «موتسارت» فى الحمام

ولما يحب يضحك

تبان سنانه العجوزه

أرنب بيخرج من ساعة الحائط

علشان يفكرنى بحاجة

كنت ناسيها من زمان

- ٢ -

صاحبى إالى نسيته فى التلاجة  
ورحت أجيب له حاجة صاقعه  
بعد ساعة من الانتظار  
لقيته بيتحول لبخار وأشباح خرافية  
بتطارد عقارب الساعة!!

- ٣ -

بنى وبينه شلال كتب  
ومساحة ود مبقعة بعفن الصداقه  
أعرف واحد صاحبى إيجن من كتر التفكير  
فى المواسير اللى بتنقط عليه وهو نايم  
يظهر إن الأوده بتغرق  
محتاج علشان أوصل له كام قالب طوب  
فعلاً شئ مضحك إنك تلاقى سرير فى  
وسط الميه

وواحد صاحبك مقرص زى الفار  
بيحاول يطلع ع المواسير  
ويبقى نفسك تشرب معاه كباية شاي  
قبل ما ينط فى الميه  
ويتحول لمركب.

- ٤ -

المزيكا إالى اتسربت من فتحة السجاده  
كانت سبب فشلى  
فى اجتياز العوائق البشرية فى الصالة  
وكراسى الأنتريه الضخمة  
بتفكرنى بأشباح القرن الـ ١٧  
وبحرارة الرومانتكين  
الكراسى المنفوخة بالغبار  
بتخبى نظره ملتهبة فى عينيها.



بعد شاف نفسه وهو ميت « ع » السرير

قام ولبس بدلته القديمة

والجزمة اللميع

والطربوش إالى كان مخبيه فى درج الشيفونيره

من ساعتها قرر يعتزل العالم ويدى نفسه آخر فرصة

عشان يعدم كل الصور والذكريات إالى قابلها فى حياته

فى أوده سحرية بتطل على وحدته

اكتشف لذه الخلود مع العرايس الماريونيت

ورجع طفل من تانى

مندهش وبرىء

من ساعتها وبعد ما قطع كل علاقاته

مع جنس بيسموه البنى آدمين -

أصبح حته من خشبة مسرحه الخاص

بقى دمية بتتحرك فى زحمة الألوان.

## اكتشاف

فجأة هتكشف

إن صوتك بقى أجمل وانت بتغنى لنفسك

أغنية قرية من طعم السجارة فى البرد

وليها علاقة بالحياة ولو من بعيد

ساعتها بس هتقرر إن ماحدث يسمعك أبداً

وبعنف أكبر من حجم الكوارث

هتقفل الراديو

وتسمع الصوت اللى بتردده الجدران بقى أجمل

وأعلى من أى تصور.

## مساء الشعور بالدراما

النهارده الجو برد

إقفل الشباك

واتأكد من أنبوبة البوتاجاز

أوعى تنسى ضحككتك فى الصلاة

خدها معاك لحد آخر الطرقه

علقها على الشماعة

هنا جنب السرير بالظبط

صدقنى مافيش أجمل من الهديان

وكل شئ جاهز لا ستقبالك





موكب الهدوء الرائع  
مساء الشعور بالدراما  
وانت متهاياً فعلاً للكوابيس  
وكلك شعور بالإثارة  
والشك في الدواليب إنها تتحول لمقابر  
أو صناديق لحفظ الجثث  
فى أى لحظة ممكن الباب يتفتح  
انت متراقب..  
فعلاً  
إنت مش لوحدك.



## في اللحظة دي بالذات

القطر اللي خارج من المحطه

من غير اعتذار للدكك

هو نفس القطر اللي خطفنى

فى ليلة ٢٦ فبراير ١٩٩٣

أظن ليلة كانت برد

والعساكر طالعين على الشبوره

منتظرين القطر يتحرك

أو أى شئ يوقف الدنيا

فى اللحظة دي بالذات

ما اعرفش ليله الواحد بيخاف م القطر  
أظن الخوف جاي م الإحساس بالسفر لمكان ماتعرفوش  
وكمان الجوبيساعد على استرجاع ذكريات مش عاوز نفتكرها  
يمكن رجلك أتعودت على المشى مسافات كثير  
وانت بتقطع «كوبرى امبابه»  
لحد ما توصل لكشك المحطة والمقص.  
واحنا عيال كنا بنستنى القطر علشان نحذفه بالطوب  
والقنابل التراب  
صحابى اللى اتفرقوا  
بعد ما ضرب الجرس  
وسابونى واقف على رصيف العمر  
وأنا عندى ١٦ سنة  
فاكر يوم العيد الصبح  
فى شارع سليمان باشا صحابى اللى ضاعوا ماين

«الأمريكيين» و «سينما أوديون»

فاكر كل التفاصيل من غير ما يغيب عن بالى المشهد

«يحيى» واحنا بنكتفه

أثر نوبه صرع على باب السينما

وهو بيصرخ زى تور مجروح

كل شبر فى جسمه جايب دم

استسلم

أخيراً رجع برىء من تانى

زى القمر شعره مبلول على قورته

وفى عينيه نظرات خجل

وسحابه على وشك الانفجار بالدموع

رجعت شاييل قميصه

جزمته

ومش قادر أنسى إننا كنا تلاته

أنا ويحيى والطريق الفاضى

قالوا لى إن اللى عاش بالصرع يموت شهيد!

لكن ساعتها ما صدقتش

ورجعت أخط على باب أودته

منعونى

وكنت سامع صوته وضحكته بترج بير السلم

فى اللحظة دى بالذات

والقطر بياكل العواميد

وبقع الضى اللى واقعه من الشباك

بتختفى بين اللحظة والتانية موجة الدخان

صحابى اللى راجعين من نفق فى الذاكره

كلهم ماتوا

والحقيقة الوحيدة فى حياتى إنى بأحبهم بالصدفة.

فعلاً

(سبب الفشل = صداقات فاشلة)

معادله سهله

أنا سلفى

وكلنا أصوليين

هى دى الحقيقة الوحيدة

والهروب فى قطر الدرجة الثالثة

الساعة اتنين بالليل

وأنا شايل شنطتى

على فكره

شنطتى فيها بنطلون

غيارين

صابونه

وعلبة سجائر ممكن تكفى لو دخنت فى الساعة ثلاث

سجائر بس

المهم انى مهاجر

زى عمال الترحيله اللي بيغنوا فى نهاية العربية

دلوقتي ممكن اقفل الراديو على أغنية بأحبها

ماتفرقش كثير أغير الكراسى

ولأ أقوم أتمشى شوية من غير ما أفكر

على فكره أنا عندى القدره أنى أسد نزيه الذاكره

بس مش عاوز

ها سيب دماغى تقرر

الأول هولع سيجاره

وآخذ منها نفسين

عندى مساحة للضحك لمدة ٨ ثوانى

بين النفس التالت والرابع

بس الحقيقه مزاجى مش رايق

كفاية أبتسم

يعنى شفايفى هتاخذ وضع غير مألوف

على الأقل بالنسبة ليا

فى اللحظة دى بالذات

خايف شفايفى تتجمد

ياترى الواحد هيبقى شكله إيه لو بقى مبتسم على طول؟

حاجة سخيفة طبعا

الشئ الوحيد اللى كان يسعدنى الكتابه

وبشكل حقيقى

ما بقتش عارف إيه اللى أنا عايزه

وبالتحديد

فى اللحظة دى بالذات.





## البُعد الثالث

مهده إلى إبتسام عبد الرحمن

كل اللي فأكره

إني ماشى مسحور

وجوايا ضوء رقيق

ورغبة في فعل الخير

وزعت على الشحاتين اللي كانوا نايمين ع الكوبرى

حوالى ٢٥, ٢ إلى فضلوا معايا

ما انكرش إني كنت مبذر

أو على الأصح

واقع تحت تأثير قوى غامضه



وهي بتكلمنى عن أشياء جميله وملهاش معنى

واحنا ما شين حاضنين بعض

فى البعد التالت لنظره وقعت من عينيها

وإدحرجت ناحية الحجر الفاضى

إلى كنا هنقعد عليه

شئ واحد كان بيمتلكنى

هو التفكير فى القوى الغامضة اللى جمعتنا

وحبات التراب الصغيره اللى اتعلقت فى جزمته

زمانها وقعت فى شوارع تانيه

أو على الأقل

فضلت تناضل لحد ما نزلت من فوق الرصيف

حبات التراب إلى قدرت توصل معاها الأوتيل

وتركب الأسانسير وتعمل علامة فوق الموكيت

وهي بتفتح الأوده

لا يمكن أبداً هتفكر فيها

الحبات الرقيقة شوهتها عجالات «الهوم سيرفيس»

ونظرات الاستنكار من المدير السئول عن الدور الـ ١٥ وغرفته  
«١٥٠٥»

علامة فوق السجاده

كانت نتيجة مشاوير عظيمه

استمرت ٤ ساعات من الحب المتواصل

والمشى البطيء داخل حدود الغبار.





# الفهرس

## قصائد من دولاب الحزن

١١	صورة من دولاب الحزن .....
١٩	شارلى شابلىن .....
٢٢	المغنى .....
٢٥	أغنية لسندريلا .....
٢٨	العميان .....
٣٢	الدنيا (إلى صلاح جاهين) .....
٣٧	اسكندرية .....
٤٣	يناير .....

## قصائد رسوم متحركة من سينما الحياة

٤٩	رسوم متحركة .....
٥٤	كاريكاتير .....
٥٩	اكتشاف .....
٦٠	مساء الشعور بالدراما .....
٦٣	فى اللحظة دى بالذات .....
٧٠	البعد التالت .....

تاريخ كتابه هذه القصائد من ٨٩ إلى ٩٤

**مطابع الهيئة المصرية العامة للكتاب**

رقم الايداع بدار الكتب ١٩٩٥/٨٦٦١

---

I.S.B.N 977-235-413-6





إن لغة الفنتازيا فى هذا الديوان سرعان ما تضيف أبعاداً أخرى  
تدفع بالدماء إلى هياكل القصيدة، والشاعر فى أغلب قصائده لا  
يعتمد على الموسيقى الخارجية واضحة الرنين كهياكل أساسية  
لبناؤه المعماري العام، لكنه يعمد إلى منطق اللوحة، كما يستفيد  
من منجزات السينما «لغة الكادر، المشهد، التصوير المقرب .. إلخ»  
فى صياغة عالم فنى متناغم.

2.716  
327r

مطابع الهيئة المصرية العامة للكتاب

